


Comentario:

Por favor no deshaci mas di e palonan di Merengue!

Pa Mercedes A.H-Monge



Na mayoria di paisnan unda cu e matanan aki ta crece e ta wordo yama "Moringa". Na Aruba nos conoce como Merengue.

Ta di tres pa cuater siman pasa cu pa prome biaha mi a scucha di e mata aki y su beneficiacion. Tur cos a cuminza ora un cliente di DIARIO a scucha mi nister pisa, y el a aconseha mi pa busca blachinan di Merengue, pasobra e ta hopi bon pa griep y vooral si ta di tipo alergico manera mayoria di biaha mi ta haye.

Puntrando aki y aya, mi a bin scucha di hendenan local con bon e mata aki ta y cu nos por probecha absolutamente tur cos di dje, for di su foyonan chikito cu ta contene hopi hero, te su flor, raiz, semia (cu ta bin den forma di bonchi largo).

E planta aki ta contene tur vitamina cu un hende por kere. E ta yuda combati diabetes, colesterol, presion halto, problemanan di weso y musculo, ta activabo memoria, ta bringa bo cansancio, e ta bon pa muchanan cu ta sufri di desnutricion y anemia, ta bon pa e imanan cu ta dunando nan yunan pecho pasobra e ta yuda traha un lechi di calidad halto, e ta mantene bo sistema digestivo y bo nieman limpi, y asina por sigui menciona mas y mas beneficio, entre otro combati y preveni cancer.

Mi ta un di e personanan cu si ta kere den remedi di tera, y mi ta usando e blachinan den forma di thee, e flornan (ora mi haya) y e semianan.

No solamente mi a informa

via internet cu tin informacion mas tanto basico, pero for di Costa Rica mi a haya sa cu nan ta cultivando Moringa (Merengue) den varios distrito di e pais, y e ta wordo procesa di forma natural (trahando puero di e blachi y flor) y cu nan ta promove e consumo di su semianan pa su multiple beneficiacion.

Na E Republica Democratico E Congo, tin un Centro di Accion, Naturaleza y Medicina, y for di dje nan ta yudando hopi mucha cu ta den horfanato bringa nan desnutricion y anemia cu excelente resultadonan, door di duna nan Moringa den tur forma posible y tambe tin docternan cu ta tratando

hendenan cu AIDS cu e mesun mata aki, y den ambos caso cu excelente resultadonan.

Aruba tabata tin hopi palo di Merengue, cu a wordo rosa pa motibo di construccion di vivienda; na Dakota casi den tur cas tabata tin un mata cu tambe a wordo kita pasobra e ta kita espacio, y mas tristo ainda, na Santa Rosa nan a kita tur!

Mi a yama puntra na LVV pasobra mi kier a puntra si mi por compra un cu su raiz pa sembr den e patio di mi cas, y nan a bisa mi cu nan a deshaci di tur, no a laga ni un, pasobra nan ta bira hopi y ta ocupa hopi espacio!

Mi ta aprecia masha hopi cu don Nelson Sprok y su señora a regala mi dos palo pa sembra, y mi ta spera nan progresa den mi cura. Door di dos colega y un bisña mi ta hayando blachi, flor y semia y plus mi ta cumprando di un meneer di Savaneta cu ta traha e blachinan chikito chikito y ta bende nan den sakito.

Mi ta pidi por favor e personanan den nos comunidad cu tin Merengue sembra den nan cas, pa por fabor no deshaci di dje nunca, e ta "un mata cu ta scapa bida" segun e científico Anselme Nkinsi di E Congo ta skirbi den un raportahe.

Na Santo Domingo nan ta yame "el arbol de la vida" y den otro paisnan nan ta yame "el arbol de la libertad" pasobra e ta libera hendenan di malesanan grave, cu su uso diario (no de vez en cuando) y continuo. Den transcurso di 45 dia di consumo Merengue, e resultadonan ta wordo sinti y refleha den e persona, segun informacion cu mi tin. Na Costa Rica, e mata aki no por wordo ranca (ta proteha pa ley) y mas bien nan ta promove pa hendenan simbre den nan cas.

Na Aruba cu e costonan di salubridad ta asina halto, y cu gobierno ta keha di esaki vooral Minister di Salud, pakico no ta promove e cuida y uso di e mata maravioso aki? Mi si ta convenci cu e ta un bon opcion, y di hecho mi a haya comentarionan

di personanan cu a cuminza use despues di a pasa den Quimio pa largo tempo, y cu ta sintiendo un cambio hopi favorable den nan salud. E comentario aki ta skirbi a base di hopi informacion cu mi a haya, incluyendo di un docter di Costa Rica cu ta aconseha su pacientnan pa complementa nan remedi convencional cu Moringa (Merengue), y e mes ta asombra di e resultadonan. Ohala e naturalistanan di Aruba, e medio ambientalistanan y gobierno mes, por cuminza fomenta e cultivo di mas Merengue na Aruba envez di su rosamento!

Nos mester aprecia y gradici Dios cu ta provee nos cu diferente remedi di tera, cu alavez di yuda nos hopi, ta practicamente gratis! Ban probecha nan!